

horoskopoa



A R I E S

martxoak 21 — apirilak 20

Ez hainbeste pentsatu. Bizi, eta beti bezain zoragarri izaten jarraitu.



T A U R U S

apirilak 21 — maiatzak 20

Ezpain eder horiek inoliz baino distiratsuago dituzu gaur. Nora zoaz?



G E M I N I

maiatzak 21 — ekainak 20

Tanga, ligak, barruko arropa kolore gorrikoa... Zu bai, zu, sexia...



C A N C E R

ekainak 21 — uztailak 20

Bidaia, zalantza, nostalgia... Non zaude? Arnasa hartu eta ondo lo egin.



L E O

uztailak 21 — abuztuak 23

Jota zaudela? Baina jota-jota? Bada, ingurukoek jota bat dantzatuko dizute!



V I R G O

abuztuak 24 — irailak 23

Ondo aterako da. Bai. Ondo aterako da, baina energia positiboa behar duzu.



L I B R A

irailak 24 — urriak 23

Joan den astea gogorra izan zen. Baina hau hobea izango da.



S C O R P I U S

urriak 24 — azaroak 23

Hitz-lapiko galanta zara zu. Zenbat hitz, berba, kontu... Zer ez duzu kontatzeko?



S A G I T T A R I U S

azaroak 24 — abenduak 23

Bakeak egitera orain? Egin ondoren? Egin behar ez direnak ez egiten ahalegindu.



C A P R I C O R N U S

abenduak 24 — urtarrilak 20

Lan asko izango duzu. Oso ondo egingo duzu, eta merezitako saria jasoko duzu.



A Q U A R I U S

urtarrilak 21 — otsailak 18

Kaka nahaslea. Bazterrak ondo nahastu eta gero, «nik ez dut ezer egin»?



P I S C I S

otsailak 19 — martxoak 20

Ez dut hainbeste negar egiten duenik ikusi, are gutxiago begiak lehor izanda.

Uxue Agirre



Duela 60 urte

(Maiatzak 29, 1937)

Lemoa Haitzaren erortzea

Lemoa Haitzaren aurkako erasoari ekiteko, ohiko estrategia erabili zuten matxinatuek. Lehenik, hegazkineria naziak eta artilleria frankistak gogor zigortu zituzten euskal indarren posizioak. Ondoren, infanteriaren ordua iritsi zen. Tropa leialak ez ziren Nafarroako II. Brigadaren eraso bortitzari aurre egiteko gai izan eta Lemoa Haitza matxinatuen esku erori zen. Haren galera erabakigarria gerta zitekeen gerran, garrantzia estrategikoa handia baitzuen. Gailur hartatik, Burdin Hesiko El Gallo zona zabala erraz bonbardatu zezaketen frankistek. Lemoa Haitza berreskuratzea ezinbestekoa zitzaien euskal indarrei.

telebista - irrátia

SORPRESAZ BETETAKO SAIOA EMANGO DU ZUZENEAN ETB2-K DATORREN OSTEGUNEAN

Juantxo Villarrealen omenez

■ ETBk Juantxo Villarrealen omenezko saioa eratu du, eta datorren ostegunean, ekainak 5, emitituko du, zuzenean, ETB2tik. Sorpresaz betetako programa izango da. Bidasoa eskubaloi taldeko entrenatzaile izan da Villarreal 22 urtean, eta hainbat sari irabazi ostean, aurten utzi egingo du zeregin hori.

I. Basterretxea / Donostia

«TALDE batean entrenatzaile moduan 22 urte egin dituen pertsona bat omendu nahi dugu, eta, horrez gainera, hainbat eta hainbat sari eta txapelketa lortu dituen». Halaxe esan digu Edu Barinagak. ETB2k gaur zortzi eskainiko duen programa bereziaren zuzendaria da Barinaga. Beronek azaldu dizkigu saioaren nondik norakoak. Hala ere, ezin izan digu askorik esan. Izan ere, «sorpresaz beteriko programa izango da, eta kontatuz gero galdu egingo luke grazia».

ETBk Donostiako Miramon auzoan duen egoitzan egingo dute saioa, gaur zortzi, eta zuzenean emitituko dute. Gaueko hamarretan hasiko da, eta ordu eta erdi iraungo du, «baina sorpresa ugari izango denez, litekeena da denbora gehiago irautea». Lopez Iturriagak aurkeztuko du, eta, hasteko, Villarrealen ibilbide profesionalari buruzko bideoa eskainiko dute.

Baina Villarrealak izan dituen harreman eta momentu garrantzitsuak ere ekarriko dituzte gogora saioan, «modu batean edo bestean». Bideo bat baino gehiago emango dituzte, musikak ere girotuko du saioa, eta gonbidatu ugari



Juantxo Villarreal, Asobal Kopa irabazi ondorengo harreran, Irunen.

ANDER GILLENEA

izango dira. «Guzti-guztia Villarreali sorpresaz betetako saioa eskaintzeko».

Orain dela hiru bat aste hasi ziren programa prestatzen. Baina horretarako ez dute Villarrealen hartu-eman handirik izan, «saioa nondik nora joango den jakin ez dezan, noski». Horrenbestez, haren senitartekoekin eta lagunekin hitz egin dute, «haiek emandako informazioarekin osatu dugu gidoia».

Hogeita bi urteko lanaren

uzta • Juantxo Villarreal Erreterian (Gipuzkoa) jaio zen, orain dela 49 urte. Bida-

soa eskubaloi taldean 22 urte bete ditu entrenatzaile moduan, 1975-76ko denboraldian heldu baitzion zeregin horri. Lehenengo denboraldian Ohorezko Mailatik Lehen Mailara jaitsi zen taldea, baina 1976-77koan berriro igo zen Ohorezko Mailara.

Harrezkero hainbat une gozo ekarri ditu Bidasoak, palmarek ederra osatuz. Ligako txapelduna birritan izan da (1986-87 / 1994-95), Europako Kopako txapelduna behin (1994-95), Europako Kopako txapeldunordea beste behin (1995-96), Espainiako Kopako txapelduna birritan

(1990-91 / 1995-96), Asobal Kopako txapelduna (1992-93), Superkopako txapelduna (1995-96), Erreko-pako txapeldunordea 1990-91n...

Ordu eta erdi iraungo du programak, «baina sorpresa ugari izango denez, litekeena da denbora gehiago irautea»

Ekainaren 5ean izango da Villarrealen omenezko saioa, ETB2an, zuzenean, Miramongo platotik

l a b u r r e a n

■ Villar: «Telebista analogikoa hamabosten bat urtetan desagertu egingo da»

Jose Manuel Villar Espainiako Komunikaziorako idazkariak telebistari buruzko mintegian hitz egin zuen atzo, Madril. *Oportunidades de Negocio en Televisión Digital y Servicios Multimedia* zen mintegiaren izena. Han esan zuenez, «telebista analogikoa hamar edo hamabost bat urte barru desagertu egingo da». Villarren arabera, lur-azaleko telebista digitalak ordezkatuko du gaur egun etxe gehienetan dagoen analogikoa. Hori dela eta, «datozen urteotarako egutegi zehatz bat egin behar da, telebista mota bat desagertu eta bestea mar txan has dadin». Horregatik, etorkizunera begira argi du Jose Manuel Villarrealak ateak telebista digitalari zabaltzeko behar zaizkiola: «Telebista analogikoaren garapenarekin jarrai-

tzea ez da komeni; izan ere, kaltegarria izan daiteke telebista digitalaren ztat».

■ Udako Euskal Unibertsitatearen 25. urteurrena 'Lagun Artea' hizpide

Udako Euskal Unibertsitatearen (UEU) 25. Urteurrenari hitz egingo dute gaur *Lagun Artea*-n saioan. Horretarako, honako gonbidatu hauek bilduko dira platora: Mikel Aizpuru UEUko zuzendaria, Historian doktorea eta Gasteizko fakultateko irakaslea; Kepa Altonaga Biologian doktorea, Leioako Zientzia Fakultateko irakaslea eta UEUko zuzendari ohia; eta Iñaki Irazabalbeitia Kimika Zientzietan doktorea, Elhuyar elkartearen lehendakaria eta bera ere UEUko zuzendari izandakoa. Antton Aranburuk aurkeztu duen saioa 01:15etan

hasiko da, ohi bezala Euskal Telebistako lehen katean.

■ Fernando Savater, 'Forum'-eko gonbidatua

Fernando Savater filosofo eta idazlea ETB2an izango da gaur goizean, *Forum* saioan. Savaterren ibilbide profesionalaz gainera, *El valor de educar* liburuan defendatzen duen tesiaz ere mintzatuko dira. David Barberok gidatzen du programa.

■ UNEDeko ikasleei zuzendutako saioa La2 katean

Urrutiko Hezkuntzarako Unibertsitate Nazionalan (UNED) ikasten ari diren ikasleei zuzendutako programa berezia eskaintzen du larunbat eta igandetan Espainiako Telebistako bigarren kateak (La2). Goi mailako hamazazpi titulazio egin daitezke UNEDen.